

疆
邦
華
書

樵歌卷下

洛陽 朱敦儒 希真

減字木蘭花

按花弄扇碧鬪遙山眉黛晚白玉闌干倚徧春風翠袖
寒難尋可見何似一雙青翅燕人瘦春殘芳草連雲
日下山

又

尋花攜李紅濛輕舟汀柳外小簇春山溪雨巖雲不飽
帆相逢心醉容易堆盤銀燭淚痛飲何言犀筯敲殘
玉酒船

又

東風桃李春水綠波花影外載酒胥山祓禊相期落錦
帆吾曹一醉卻笑新亭人有淚相對清言不覺黃昏
雨打船

又

閒人行李羽扇芒屨塵世外一疊溪山也解分風送客
帆時平易醉無復驚心并濺淚長揖忘言回櫂桃花
插滿船

又

劉郎已老不管桃花依舊笑要聽琵琶重院鶯啼覓謝
家曲終人醉多似潯陽江上淚萬里東風國破山河
落照紅

又

慵歌怕酒今日春衫驚著瘦雙燕簾櫳金鴨香沈客淚
中琵琶重聽誰信人閒多少恨落日東風吹得桃花
滿院紅

又秋日飲酒香山石樓醉中作

古人誤我獨舞西風雙淚墮鶴去無蹤木落西陵返照
紅人閒難住擲下酒杯何處去樓鎖鐘殘山北山南
兩點煙

又

無知老子元住漁舟樵舍裏暫借權監持節紆朱我甚
慚不能者止免苦龜腸憂虎尾身退心閒賸向人閒

活幾年

又

斫魚作鮓酒面打開香可醉相喚同來草草杯盤飲幾
杯人生虛假昨日梅花今日謝不醉何爲從古英雄
總是癡

又

今年梅晚懶趁壽陽釵上燕月喚霜催不肯人閒取次
開低鬟掩袂愁寄玉闌金井外粉瘦香寒獨抱深心
一點酸

又

無人惜我我自殷勤憐這箇恁峭惺惺不肯隨人獨自

行 乾坤許大只在棘鍼尖上坐依舊多情攬著虛空
睡到明

又

年衰人老鬢鑠支離君莫笑白日青天我自心情勝少
年超凡入妙遊戲神通隨意到酒聖詩仙舞榭虛空
駕鐵船

又

虛空無礙你自癡迷不自在撒手遊行到處笙歌擁路
迎天然美滿不用些兒心計算莫聽先生引入深山
百丈坑

又

無人請我我自鋪氍松下坐酌酒裁詩調弄梅花作侍
兒心歡易醉明月飛來花下睡醉舞誰知花滿紗巾
月滿杯

又

花隨人去今夜錢塘江上雨宿酒殘更潮過西窗不肯
明小羅金縷結盡同心留不住何處長亭繡被春寒
掩翠屏

又

有何不可依舊一枚閒底我飯飽茶香瞌睡之時知上
牀百般經過且喜青鞵蹋不破小院低窗桃李花開
春晝長

又

江南春水羅幙黃昏寒未退
好箇相知唱到姮娥斂黛
眉 夜闌人醉風露無情
花有淚畫角殘時一片參旗

紅杏西

點絳脣

淮海秋風冶城飛下揚州葉
畫船催發傾酒留君別
臥倒金壺相對天涯客
陽關徹大江橫絕淚溼杯中月

又

客夢初回臥聽吳語開帆索
護霜雲薄澹澹芙蓉落
畫舫無情人去天涯角
思量著翠蟬金雀別後新梳掠

又

至日春雲萬般祥瑞朝來奏太平時候樂事家家有
玉指呵寒酥點梅花瘦金杯酒與君爲壽只願人長久

又

春雨春風問誰染就江南草燕嬌鶯巧只是參軍老
今古紅塵愁了人多少尊前好緩歌低笑醉向花間倒

又

綠徑朱闌暖煙晴日春來早自家亭沼不問人尋討
攜酒提籃兒女相隨到風光好醉敲紗帽索共梅花笑
柳梢青

狂蹤怪迹誰料年老天涯爲客帆展霜風船隨江月山
寒波碧如今著處添愁怎忍看參西雁北洛浦鶯花

伊川雲水何時歸得

又

松江勝集中秋載酒幽人閒客雲將遲疑桂娥羞詔一
歡難得 天憐我輩淒涼借萬里晴空湛碧浩浩煙波
堂堂風月今夕何夕

又

紅分翠別宿酒半醒征鞍將發樓外殘鐘帳前殘燭窗
邊殘月 想伊繡枕無眠記行客如今去也心下難拚
眼前難覓口頭難說

又

梅蒸乍熱無處散策芳菲初歇席展涼莞帳垂黃草天

然奇絕 披襟永晝清風更薦枕良宵皓月一夢遊仙
輒雲推倒廣寒宮闕

又季女生日

秋光正潔仙家瑞草黃花初發物外高情天然雅致清
標偏別 仙翁笑酌金杯慶兒女團圓喜悅嫁與蕭郎
鳳凰臺上長生風月

又

水雲晚照浮生了了霜風衰草日月金梭江山春夢天
多人少 赤松認得虛空便一向飛騰縹緲直上蓬瀛
回看滄海淒然長嘯

采桑子彭浪磯

扁舟去作江南客。旅雁孤雲萬里煙塵回首中原淚滿巾。碧山對晚汀洲冷。楓葉蘆根日落波平。愁損辭鄉去國人。

又重陽病起飲酒連夕

天高風勁塵寰靜。佳節重陽葉下瀟湘碧海晴空一陣霜。安排絃管傾芳醞。報荅秋光。晝短歌長紅燭黃花夜未央。

又

一番海角淒涼夢。卻到長安翠帳犀簾依舊屏斜十二山。玉人爲我調琴瑟。整黛低鬟雲散香殘風雨蠻溪半夜寒。

憶秦娥若無置酒朝元亭歸厚同飲作

西江碧江亭夜燕天涯客天涯客一杯相屬此夕何夕
燭殘花冷歌聲急秦關漢苑無消息無消息戍樓吹
角故人難得

又

霜風急江南路上梅花白梅花白寒溪殘月冷村深雪
洛陽醉裏曾同摘水西竹外常相憶常相憶寶釵雙
鳳鬢邊春色

又

吳船窄吳江岸下長安客長安客驚塵心緒轉蓬蹤迹
征鴻也是關河隔孤飛萬里誰相識誰相識三更月

落斗橫西北

又至節赴郡會赦到

歌鐘列公堂盛會酬佳節酬佳節皇恩宣布早梅爭發
舞場椎鼓催回雪金壺斂酒瓊酥熱瓊酥熱今朝不
飲幾時歡悅

卜算子除夕

江上見新年年夜聽春雨有箇人人領略春粉澹紅輕
注深勸玉東西低唱黃金縷撚底梅花總是愁酒盡
人歸去

又

陌上雪銷初纔得江梅信翦綵盤金院落香便覺燒燈

近樂事眼前多春酒今年勝好趁迎梅接柳時滿引金杯飲

又

碧瓦小紅樓芳草江南岸雨後紗窗幾陣寒零落梨花晚看到水如雲送盡鴉成點南北東西處處愁獨倚闌干徧

又

古澗一枝梅免被園林鎖路遠山深不怕寒似共春相趁幽思有誰知託契都難可獨自風流獨自香明月來尋我

又

灼灼一枝桃粉豔天然好只被春風擺撼多顏色凋零
早結子未爲遲悔恨隨芳草不下山來不出溪待守
劉郎老

又

旅雁向南飛風雨羣初失飢渴辛勤兩翅垂獨下寒汀
立鷗鷺苦難親矰繳憂相逼雲海茫茫無處歸誰聽
哀鳴急

又

山曉鷓鴣啼雲暗瀧州路榕葉陰濃荔子青百尺桄榔
樹盡日不逢人猛地風吹雨慘黯蠻溪鬼峒寒隱隱
聞銅鼓

清平樂

亂紅深翠樓閣春風外胡蝶成團飛照水睡鴨無人驚
起身閒更覺身輕酒壺歌扇隨行芳草綠楊堤畔一
聲初聽啼鶯

又木樨

人閒花少菊小芙蓉老冷澹仙人偏得道買定西風一
笑前身原是疏梅黃姑點碎冰肌惟有暗香長在飽
參清露霏微

又

相留不住又趁東風去樓外夕陽芳草路今夜短亭何
處杏花斜壓闌干朱簾不卷春寒惆悵黃昏前後離